

Glembert Croes ta pensando ariba carrera politico

ORANJESTAD (AAN) Sr. Glembert Croes a caba di regresa Aruba for di Hulanda, na unda el a cursa estudioan superior y ta den espera di su titulo di Master. El a regresa pa traha ariba su tesis di presentacion pa e titulo. Mientras tanto, ta su intencion, segun DIARIO tin entendi, di establece su mes permanentemente na Aruba.

Tratando di Sr. Glembert Croes, e pregunta logico cu ta surgi den mente di poblacion ta si e tin algun idea di algun dia den futuro haci su entrada den politica.

"Den e momentonan actual mi ta trahando na Banco di inversion. Berdad ta cu mi a bolbe pa keda Aruba. Encuanto politica, mi tin tur intencion di drenta politica, pa varios motibo.

"For di tempo di mucha mi a lanta den un hogar na unda politica tabata topico di cada momento. Mi a siña hopi tocante politica y mi ta sinti hopi pa politica. Mi a lanta den filanan di Mep y ta mi intencion di habri caminda pa mi mes, a base di mes meritonan, den e partido aki.

"Mi ta sinti tambe cu

Aruba tin mester di politiconan hoben, cu experiencia y e boluntad pa traha sin interes den beneficio di Aruba y di pueblo di Aruba. Ami tin e boluntad y mi ta willing pa asumi mi responsabilidadnan politico como Arubiano na momento cu Pueblo haci un apelacion ariba mi."

DIARIO a puntra Sr. Glembert Croes si el a ser acerca pa miembronan di Partido en referencia cu e Convencion di dia 27 of e eleccion di lideman di bario.

"Pa e eleccion di lideman di bario di Playa Pariba mi a

haya un invitacion pasobra mi ta biba den e parti ey di Playa. Te ainda mi no a haya un invitacion pa asisti na e Convencion."

DIARIO a puntra Sr. Glembert Croes kico e ta pensa di politica en general, na Hulanda, Merca, Aruba y otro paisnan.

"Durante mi estadia na Hulanda mi a sigui tur e desaroyonan politico di cerca y mi a admira e manera cu e politiconan Hulandes ta hiba politica den un forma obhetivo. Mi ta kere cu e meta aki mester ser logra na Aruba tambe, na

unda nos mester bira mas obhetivo y unda rivalidad politico no mester ta un obstaculo pa enfrenta e problemanan cu Aruba tin.

"Ta mi desco di sirbi mi Pueblo segun mi capacidad. Pesey mi a sigui mi estudioan, pa mi por contribui na bienestar general for di politica.

"Permitimi manda un cordial saludo pa Pueblo di Aruba den su totalidad. Mi ta spera pronto di ta den contacto directo y personal den tur skina di Aruba, pa tende for di Pueblo mes kico e problemanan ta y kico ta biba cerca nan."



Na Palm Beach na altura di un restaurant, Polis a topa un chofer cu a drenta mondi cu su auto. A resulta cu e chofer tabata pata pata burachi. Riba e foto por mira e dinamico agente policial "Jan" den accion. Mester bisa cu chofernan asina ta causante di accidente. E chofer a ser hiba cas pa sosega su curpa mientras cu e auto a keda na e sitio.

Investigacion ta sigui tuma lugar Cinco persona deteni relaciona cu falsificacion di carchi di bingo

ORANJESTAD (AAN) -- Manera DIARIO a publica, algun siman pasa asistencia di Recherche a ser solicita na un hotel grandi caminda a detene un persona cu a falsifica carchi di bingo.

Ta asina cu e homber d.J. a bay reclama su premio y durante control a keda constata cu e carchi ta falsifica.

Miembronan di Recherche no kier a suministra ningun informacion encuanto e caso aki ya cu tin indicacion cu tin mas hende envolvi.

Dicho hecho. Relaciona cu e caso aki, despues di investigacion profundo, miembronan di Recherche a detene e hombernan J.T., D.F. y K.C.

Investigacion a muestra cu e sistema di falsificacion aki a worde usa na diferente lugar caminda tabata tin bingo.

Diadomingo den horanan di mainta, pa ser exacto 8'or, miembronan di Recherche a detene e homber R.M.T.(35) na su cas na Bubali. R.M.T. ta ser acusa di ta forma parti di e gang cu a falsifica carchi di bingo.

Durante interrogacion, el a admiti di a comete e delito. El a ser presenta dilanti un fiscal auxiliar y a keda encarcela pendiente mas investigacion.

Te ainda e investigacion no a termina. Probablemente tin mas persona envolvi den e caso aki.

Trahadornan di W.E.B. a fada

Cualquier momento "Black out"

ORANJESTAD (AAN) No solamente Gobierno ta lagando hopi di desea riba e acuerdo y compromisonan cu e trahadornan na e planta di awa y electricidad tin cu Gobierno pero dia pa dia e situacion na W.E.B. ta birando un problema

serio ora cu W.E.B. mester laga kita coriente for di diferente bario di Aruba pa yuda Coastal cu coriente y e situacion di e boilerman di W.E.B. no ta di e bon ey. Tur cos ta muestra normal den W.E.B., pero esey no ta e caso, asina un trahador di

W.E.B. a duna di conoce.

"Tin hopi cos ta pasa den e planta di awa y electricidad pero poco atencion Gobierno ta duna na e planta y mas ainda e trahadornan" tabata expresion di un miembro di sindicato di

trahadornan di W.E.B.

Segun e miembro di sindicato e trahadornan a fada di tanto spera riba e acuerdo y compromiso serio cu Gobierno.

Si Gobierno no cumpli cu e acuerdo y compromiso henter

pueblo di Aruba lo sufri mescos cu e trahadornan.

Segun e trahador y alavez miembro di e sindicato por spera cualkier momento Black Out riba henter Aruba si gobierno no cumpli mas pronto cu ta posible.